



BOSNA I HERCEGOVINA  
PARLAMENTARNA SKUPŠTINA  
BOSNE I HERCEGOVINE  
PREDSTAVNIČKI DOM

**Ustavno - pravna komisija**

Broj: 01/1-011-491/03

Sarajevo, 8.4.2003.

**Z A P I S N I K**

**6. sjednice Ustavno - pravne komisije**

Sjednica je održana 8.4.2003. godine s početkom u 14,00 sati.

Sjednici su prisustvovali:

- |                     |                      |
|---------------------|----------------------|
| 1. Beriz Belkić     | 5. Seada Palavrić    |
| 2. Mirsad Ćeman     | 6. Petar Kunić       |
| 3. Martin Raguž     | 7. Nijaz Duraković i |
| 4. Borislav Paravac | 8. Miro Ivo Jović    |

Odsutan je bio član Komisije Tihomir Gligorić, koji je najavio odsustvo.

Sjednici su prisustvovali predstavnici predlagača zakona, poslanik Muhamed Moranjkić, te predstavnici Vijeća ministara BiH: Dragan Mektić, Ljiljana Lalović, Mario Nenadić i Rusmira Tihić.

Sjednici je prisustvovao i Milan Zjajić, sekretar Komisije, i Ezmana Hadživdić, student stažista. Predsjedavajući Komisije Mirsad Ćeman predložio je sljedeći

**D N E V N I R E D**

1. Verificiranje zapisnika 5. sjednice, održane 25.3.2003. godine;
2. Prijedlog zakona o izmjeni Izbornog zakona BiH;
3. Razmatranje, po zaključku sa 10. sjednice Predstavničkog doma, pristiglih amandmana na:
  - a) Prijedlog zakona o kretanju i boravku stranaca i azilu,
  - b) Prijedlog zakona o izmjenama i dopunama Zakona o izbjeglicama iz BiH i raseljenim licima u BiH,
  - c) Prijedlog zakona o Matici iseljenika Bosne i Hercegovine,
4. Ostala pitanja.

Predloženi dnevni red jednoglasno je prihvaćen.

Prije prelaska na dnevni red, član Komisije Nijaz Duraković iznio je primjedbu na termine zakazivanja sjednica, ističući da su se sve sjednice do sada održavale utorkom, i da su, po njemu, profesionalno uposleni poslanici prilagođavali termine sebi. Istaknuo je da utorkom ima predavanja i da mu baš taj dan ne odgovara.

Predsjedavajući Ćeman je na ovu primjedbu odgovorio da se do sada nalazio u neugodnoj situaciji prilikom zakazivanja termina održavanja sjednica, tražeći kompromis između rokova utvrđenih Poslovníkom, mogućnosti i želja ostalih članova Komisije. Naglasio je da je sjednice Komisije obično zakazivao dan prije ili poslije održavanja sjednica doma, uvažavajući dolazak članova koji nisu iz Sarajeva. U cilju uvažavanja svih članova predložio je, a Komisija jednoglasno podržala sljedeći

**Z a k l j u č a k**

Članovima Ustavno-pravne komisije omogućuje se da određuju termine održavanja sjednica Komisije.

Predsjedavajući će sjednice zakazivati u terminu koji odrede članovi Komisije, tako da će termin prve naredne sjednice, uvažavajući rokove utvrđene Poslovníkom, odrediti član koji se nalazi na prvom mjestu spiska članova Komisije sačinjenog po abecednom redu, sljedeće sjednice drugi sa spiska itd.

**Ad. 1. Verificiranje zapisnika 5. sjednice, održane 25.3.2003. godine**

Kako nije bilo primjedbi, zapisnik 5. sjednice, održane 25.3.2003. godine, jednoglasno je verificiran.

## **Ad. 2. Prijedlog zakona o izmjeni Izbornog zakona BiH**

Poslije kraće uvodne riječi predlagača Muhameda Moranjkica, u raspravi su učestvovali gotovo svi članovi Komisije.

Seada Palavrić istaknula da su preduslov za kvalitetna rješenja izmjene i dopune Izbornog zakona BiH i promjene Ustava.

Martin Raguž naglasio je neophodnost izmjena i dopuna Izbornog zakona, ali da bi se to trebalo raditi u vidu kompletnog prijedloga Vijeća ministara BiH, a ne parcijalno. Sličan stav imali su i ostali članovi Komisije, s tim što su Duraković, Kunić, Paravac i Belkić izrazili spremnost da daju podršku i ovom prijedlogu, uvažavajući angažiranje predlagača i mogućnost potpunijeg konstituiranja Doma naroda Parlamenta Federacije BiH.

Nakon ove rasprave, pristupilo se glasanju i Ustavno-pravna komisija Predstavničkog doma, kao nadležna komisija, sa četiri glasa "za", jednim glasom "protiv" i tri "uzdržana" je:

1. podržala principe predloženog zakona;
2. prihvatila tekst Prijedloga zakona o izmjeni Izbornog zakona BiH;
3. konstatirala da je predloženi zakon neophodno donijeti.

U smislu odredbi člana 89. Poslovnika Predstavničkog doma Parlamentarne skupštine BiH, za izvjestioca u plenarnoj fazi Komisija je imenovala predsjedavajućeg Mirsada Čemana.

## **Ad. 3. Razmatranje, po zaključku sa 10. sjednice Predstavničkog doma, pristiglih amandmana na:**

### **a) Prijedlog zakona o kretanju i boravku stranaca i azilu,**

Odmah nakon otvaranja ove tačke dnevnog reda, za riječ se javio Milan Zjajić, sekretar Komisije. Sekretar je rekao kako smatra da Komisija treba imati u vidu odredbe člana 94. stav 3. Poslovnika. Potom je riječ uzeo predlagač Zakona, upoznavajući članove Komisije o prijedlogu zakona i pridošlim amandmanima.

Cijeneći navedeno, Ustavno-pravna komisija jednoglasno je zauzela stav da ona nije nadležna da odlučuje o uloženim amandmanima i da o eventualnom uvažavanju amandmana u ovoj fazi zakonodavnog postupka, u smislu odredbi člana 94. tačka 3. a) i b) Poslovnika, odlučuje predsjedavajući u konsultacijama sa zamjenicima predsjedavajućeg doma, te da je na Predstavničkom domu da, cijeneći potrebu za donošenjem i neusaglašenost o pitanjima podjele nadležnosti, odluči da li će ili ne odgoditi izjašnjavanje u drugom čitanju.

### **b) Prijedlog zakona o izmjenama i dopunama Zakona o izbjeglicama iz BiH i raseljenim licima u BiH**

Bez posebne rasprave, Komisija je konstatirala da, u roku utvrđenom zaključkom Predstavničkog doma, na Prijedlog zakona o izmjenama i dopunama Zakona o izbjeglicama iz BiH i raseljenim licima u BiH nije bilo uloženih amandmana.

### **c) Prijedlog zakona o Matici iseljenika Bosne i Hercegovine**

Martin Raguž, član Komisije, istaknuo je da je ovaj zakon birokratski, više pamflet negoli zakon i da daje samo formalni osnov, te da Komisija treba uticati na njegov sadržaj.

Zatim su predstavnici predlagača u kratkim crtama dali komentar na uložene amandmane.

Na kraju je Komisija konstatirala:

- da je Prijedlog zakona o Matici iseljenika BiH Vijeće ministara BiH dostavilo Parlamentarnoj skupštini BiH 7.10.2002. godine;
- da je Kolegij Predstavničkog doma 24.12.2002. godine za nadležnu odredio Komisiju za ljudska prava, imigraciju, izbjeglice i azil;
- da je Ustavno-pravna komisija 30.12.2002. godine utvrdila postojanje valjanog ustavno-pravnog osnova za donošenje, a nadležna Komisija za ljudska prava, imigracije, izbjeglice i azil 30.1.2003. podnijela Izvještaj Predstavničkom domu;
- da su poslanici ovog saziva Predstavničkog doma imali mogućnost ulaganja amandmana u fazi pred nadležnom komisijom koja je jednoglasno zauzela stav da nije nadležna da odlučuje o uloženim amandmanima i da o eventualnom uvažavanju amandmana u ovoj fazi zakonodavnog

postupka, u smislu odredbi člana 94. tačka 3. a) i b) Poslovnika, odlučuje predsjedavajući u konsultacijama sa zamjenicima predsjedavajućeg doma.

**Ad. 4. Ostala pitanja**

Pošto nije bilo prijedloga za ovu tačku dnevnog reda, predsjedavajući je u 15,30 sati zaključio sjednicu.

SEKRETAR KOMISIJE  
**Milan Zjajić**

PREDSJEDAVALJUĆI KOMISIJE  
**Mirsad Ćeman**